

油

牙

下

中

...

...

治
河
圖
略

王
喜
撰

中
華
書
局

叢書集成初編

河防記（及其他二種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一
統一書號：一七〇一八·一五一

此據墨海金壺本
影印初編各叢書
僅有此本

欽定四庫全書提要

治河圖畧一卷元王喜撰喜爵里無考其書首列六圖圖末各系以說而附所爲治河方畧及歷代決河總論二篇於後其文稱臣謹敘臣謹論云云疑爲經進之本考元史順帝紀及河渠志至正中河決白茅堤金堤大畧臣訪求治河方畧喜書其作於是時歟其大旨取李尋因其自然之說惟以浚新復舊爲主厥後卒用賈魯之策疏塞並舉挽河東行以復故道與是編持論相合則當時固已採錄其言矣特史文闕畧未著其進書本末耳卷中所圖河源頗多訛舛蓋崑崙星宿遠隔窮荒自我

國家底定西陲慈嶺于闐悉歸版籍於是河有重源之蹟
始確然得其明徵元人所述憑潘昂霄之所記昂霄所
記憑篤什案篤什舊作都寔今改正之所傳輾轉相沿率由耳食撰
元史者且全錄其文於河渠志以爲亘古所未聞喜之
踴訛襲謬又何怪乎取其經畧之詳而置其考據之疎
可也

原序

臣竊謂水之在天下有自然之利亦有自然之害順而導之者易爲力逆而遏之者難爲功譬猶人之一身血脉流通則無病血脉壅滯則病生審而治之宣其壅滯使之流通則病自去治水之道亦當如此竊見比年以來黃河失道汎濫曹濮間生民墊溺中原彫耗莫此爲甚以致上千宵旰之憂勤次勞廟堂之軫念見者聞者莫不惻然思有以救之然未有一出謀建一策有補於明時者以其但知河之爲害而未知其所以爲害臣故歷考累代河流變遷之故與浚治之術粗得其詳而知其有無不可爲之理且何以言之皆緣下流壅滯水勢不能自泄是以決溢爲害爲今之計莫若浚入淮舊

河于南以順其流仍導一新河于北以分其勢大河既分其流自緩無泛溢之患矣禹之播九河漢之浚屯氏宋之導清河于南北者卽此道也猶百鈞之物一人舉之則力不能勝兩人舉之則力有餘此理甚明可舉而行今將禹河漢河宋河今河圖陳於左以備睿覽有以考擇庶幾拯溺之一助云

王喜謹序


治河圖畧

墨海金壺 史部

元 王 喜 撰

歷代河圖

禹河之圖



臣謹案禹河自于闐嵯嶺兩源合流東注蒲昌海潛行南出積石經龍門三千里而至于華陰又自南而東至于底柱孟津洛汭大伾又自東而北過泇水大陸迤邐北行至冀東兗北分播于九河趨碣石入海由是觀之氣分則緩勢分則弱禹所以治河之法行水之道其功皆在於九河之播也蓋自大伾以下行於平地河勢悍猛而平地土疏非堤防所能捍禦故開八條以殺其怒又自大陸以北到兗州地方爲下流之衝其勢愈大爲害愈甚禹則當其將入海未入海之處疏其正派分其支流使都入於海各派旣安行於外正流亦順道其中不復漫流爲害其到此而不得不分者亦勢之必然也

臣謹案漢河自孟津底柱以上河行地中無所變遷自大伾以下河高於地易於泛濫自周定王時已徙故瀆及漢元光間改向頓邱東北流經濮濟從樂陵入海文帝時決酸棗武帝時決瓠子皆在今濮陽縣遂通淮泗又漢溝洫志河決館陶在今濮州分爲屯氏河在今大名路北流入海其河深廣與大河等蓋亦因其自決之勢就浚此河以泄大河故無復有汎溢之患繇是觀之河之下流壅則塞泄則平漢之所以能息菑弭患者其功專在於屯氏之分也

